

嘉業堂
叢書

毛詩正義

第五册

毛詩正義卷第十六

唐國子祭酒曲阜縣開國子臣孔穎達等奉敕撰定

正小雅

伐木 天保 采薇 出車 枣杜

魚麗 南陔等三篇序 南有嘉魚

南山有臺 由庚等三篇序 蓼蕭

伐木六章章六句至厚矣 正義曰作伐木詩者燕朋
友故舊也又言所燕之由自天子至於庶人未有不須
友以成者王者既能內親其親以使和睦又能外友其
賢而不棄不遺忘久故之恩舊而燕樂之以此化民於
上民則效之於下則民德皆歸於淳厚不澆薄矣朋是

同門之稱友爲同志之名故舊卽昔日之朋友也然則朋友新故通名故舊唯施久遠此云朋友可以兼故舊而並言之者此說文王新故皆燕故異其文友賢不棄燕朋友也不遺故舊是燕故舊也舊則不可更擇新交則非賢不友故變朋友云友賢也燕故舊卽二章卒章上二句是也燕朋友卽二章諸父諸舅卒章兄弟無遠是也經序倒者經以主美文王不遺故舊爲重故先言之而後言父舅先兄弟見父舅亦有故舊也序以經雖主燕故舊而故舊亦朋友故先言朋友以見總名而又別言故舊以明其爲二事天子至于庶人未有不須友以成者卽序首章之事因文王求友而廣言貴賤也經

以由須朋友而燕之故先論求友之由序則以詩本主爲燕所以倒也二章卒章所陳皆爲燕食說王不得不召父舅又於兄弟陳王之恩皆是燕朋友故舊也經兼陳食禮而序不言亦舉其歡心足以兼之其親親以下因說王者立法且明次篇之義親親以睦指上常棣燕兄弟也友賢不棄不遺故舊卽此篇是也常棣雖周公作旣內之於治內之篇故爲此次以示法是比篇皆有義意 伐木至且平 毛以爲有人伐木於山阪之中丁丁然爲聲鳥聞之嚶嚶然而驚懼以興朋友二人相切磋設言辭以規其友切切節節然其友聞之亦自勉勵猶鳥聞伐木之聲然也鳥旣驚懼乃飛出從深谷之

中遷於高木之上以喻朋友旣自勉勵乃得遷升於高位之上鳥旣遷高木之上又嚶嚶然爲其鳴矣作求其友之聲以喻君子雖遷高位而亦求其故友所以求之者視彼鳥之無知猶尙作求其友之聲況人之有知焉得不求其友生乎君子爲此而求友也旣居高位而不忘故友若神明之所聽祐之則朋友終久必志意和且功業平鄭以爲此章遠本文王幼少之時結友之事言文王昔日未居位之時與友生伐木於山阪丁丁然爲聲也於時雖處勤勞猶以道德相切直時有兩鳥在旁嚶嚶然而鳴此鳥之鳴似朋友之相切故連言之此鳥乃出從深谷之中遷於高木之上又復嚶嚶然爲其

鳴矣作求其友之聲然視彼鳥矣猶作其求友之聲況是人何得不求其友生乎故文王所以求友生也大意與毛同唯不興爲異耳 傳丁丁至驚懼 正義曰此丁丁文連伐木故知伐木聲下云出自幽谷遷于高木則木是其鳥驚懼而飛遷矣故知嚶嚶然驚懼言此鳥爲驚懼而鳴耳嚶嚶非驚懼之聲也故下云嚶其鳴矣不復驚懼鳴亦嚶嚶是也然釋訓云丁丁嚶嚶相切直也傳意以此伐木鳥鳴喻相切直之事今傳解詩經之文耳爾雅徑訓興喻之義釋訓云翫翫卬卬君之德也藪藪萋萋臣盡力也皆徑釋其義不釋詩文王肅亦云鳥聞伐木驚而相命嚶嚶然故曰丁丁嚶嚶相切直以

興朋友切切節節其言得傳旨也言相切直者謂切磋
相正直也 箕丁丁至言之 正義曰箕全引釋訓之
文具解丁丁嚶嚶之義與傳同也故下卽云嚶嚶兩鳥
聲丁丁亦是伐木聲也故郭璞曰丁丁斫木聲嚶嚶兩
鳥鳴但正伐木鳥鳴時有此相切直之義故總言丁丁
嚶嚶爲相切直言未居位謂未居諸侯之位在於農畝
時山巖者以下云伐木于阪故知山旁巖崖之處故云
山巖也箋必以爲文王身與友生伐木者以爾雅云丁
丁嚶嚶相切直自此以下陳鳥鳴求友無相切直之義
則伐木之時相切直也而下一章釀酒文連伐木是酒
爲伐木而設卽伐木之人是朋友矣朋友旣親伐木明

文王與之俱行故知親在農禮記注士之子食祿不免農則大夫以上子免農矣時文王爲諸侯世子而在農者案史記周本紀大王曰我出當有興者其在昌乎則文王在大王之時年已長大是諸侯世子之子耳大王初遷於岐民稀國小地又隘險而多樹木或當親自伐木所以勸率下民不可以禮論也言嚶嚶兩鳥者以相切直若一鳥不得有相切故郭璞曰嚶嚶兩鳥鳴以喻朋友切磋相正是以義勢便爲兩鳥其實一鳥之鳴亦嚶嚶也故知嚶其鳴矣是一鳥也又解鳥鳴與伐木文連之意以文王相切直之時此兩鳥共鳴亦似朋友之相切嗟及其遷處高木嚶鳴相求又似朋友之相求故

下觀之以爲喻此鳴之志似於有朋友之道故連言之
葛覃因以黃鳥爲興亦此類也 伐木至有咎 毛以
爲伐木其杗許許然故鳥驚而飛去以喻朋友之相勵
故德進而業脩也此所與切磋之故舊今以筐釀其酒
有興然而美與之燕飲焉王非直燕其故舊又旣有肥
羾之羊以召朋友諸父而燕之俱有羊酒各舉其一也
王意又殷勤諸父兄弟必盡召之王言曰寧召之適自
不來則已無得不召之使言我不顧念之而懷怨也於
是粲然洒埽其室庭陳飲食之饋黍稷之等有八簋也
旣有肥羾之牡以召諸舅而食之寧召之適自不來則
止無使懷怨令我有咎過焉言王厚其朋友故舊爲設

燕食兼有焉 鄭以爲嚮時與文王伐木許許之人文
王有酒而飲之本其昔日之事也餘同 傳許許至曰
渭 正義曰以許許非聲之狀故爲柿貌上言丁丁之
聲下言於阪之處互以相通明在阪伐之爲聲而有柿
也以筐曰釀以藪曰渭者筐竹器也藪草也濾酒者或
用筐或用草於今猶然毛氏蓋相傳爲說因釀言渭逆
解下文用草者用茅也僖四年左傳曰爾貢苞茅不入
王祭不供無以縮酒是也 傳笄未至仁者 正義曰
釋畜云未成羊曰笄郭璞曰今俗呼五月羔爲笄是也
傳以經稱諸父舅序云燕朋友故舊則此父舅是文王
之朋友也禮天子謂同姓諸侯諸侯謂同姓大夫皆曰

父異姓則稱舅故曰諸父諸舅也禮記注云稱之以父與舅親親之辭也覲禮說天子呼諸侯之義曰同姓大國則曰伯父其異姓則曰伯舅同姓小國則曰叔父異姓則曰叔舅是天子稱諸侯也左傳隱公謂臧僖伯曰叔父有憾於寡人鄭厲公謂原繁曰願與伯父圖之禮記衛孔悝之鼎銘云公曰叔舅是諸侯稱大夫父舅之文也諸侯則國有大小之殊大夫唯以長幼爲異故服虔左傳注云諸侯稱同姓大夫長曰伯父少曰叔父是也然則諸侯謂異姓大夫長者亦當爲伯舅但經傳無其事耳公羊傳曰王者之後稱公大國稱侯皆千乘小國稱伯子男左傳曰在禮卿不會公侯會伯子男可也

分五等爲二節皆以公侯爲上等伯子男爲下等明大
邦謂公侯小邦謂伯子男其稱牧伯則異曲禮曰王官
之長曰伯是職方天子同姓謂之伯父異姓謂之伯舅
東西二伯又曰九州之長入天子之國曰牧天子同姓
謂之叔父異姓謂之叔舅禮記注云牧尊於大國之君
而謂之叔父避二伯也亦以此爲尊禮或損之而益謂
此類也言由避二伯故稱叔因以別異大邦之君亦以
損其稱而更益其尊故云損之而益也齊大公爲王官
之伯左傳云王使劉定公賜齊侯命曰昔伯舅大公佐
我先王是稱大公爲伯舅也及齊桓公興霸功王又以
二伯之禮命之僖九年傳曰王使宰孔賜齊侯胙曰使

孔賜伯舅胙是也周公亦是分陝之伯而魯頌云王曰
叔父者以其實成王叔父以本親言之也其晉文公亦
有霸功而王策命辭云王曰叔父者齊桓晉文雖俱有
霸功天子賜命皆本其祖大公受二伯命故還以二伯
之禮賜桓公唐叔本受州牧之命故還以州牧之禮命
文公故唐叔文公俱稱叔父左傳周景王謂籍談曰叔
父唐叔是唐叔亦受州牧之禮而稱叔父也僖二十四
年傳王出適鄭使來告難曰敢告叔父謂魯爲叔父成
二年傳王告翬朔曰今叔父克遂有功于齊謂晉爲叔
父也昭七年王使追命衛襄公曰叔父陟恪在我先王
之左右是謂衛爲叔父也是晉與魯衛王皆呼之爲叔

父昭九年王使詹桓伯辭於晉曰伯父惠公歸自秦又謂晉侯爲伯父由此觀之魯衛爲大國而稱叔父晉國之中伯叔俱稱不同者以魯雖周公之後周公位冢宰爲東伯而周公不之國故事繫伯禽左傳曰燮父禽父王孫牟並事康王三國俱以令德作王卿明兼州牧矣燮父唐叔之子王孫牟康叔之子康叔稱叔父是爲州牧尙書酒誥命康叔之辭曰明大命於殊邦鄭云康叔爲連屬之監則康叔後或爲州牧燮父王孫牟或名繼其父爲州牧也伯禽作費誓專征徐戎爲方伯可知三國並爲大國王室之親又皆二伯之後尊而異之所以皆稱叔父焉晉又稱伯父者以晉旣大國世作盟主故

變稱伯父耳尙書文侯之命王曰父義和平王得文侯
夾輔周之勳尤親之而直稱父也天子稱朝廷公卿則
無文蓋有爵者自依諸侯之例無爵者亦應以此長幼
稱伯父叔父大夫以下位卑其稱父舅以否無文以明
之此傳以及下經父舅兼有解天子所呼父舅之文以
諸侯於大夫猶天子於諸侯同有父舅之名故連釋之
焉既此篇燕朋友而呼父舅是父舅爲天子朋友事自
明矣因天子有交友之義已釋諸侯亦有父舅故亦因
解國君友其賢臣并及大夫友其宗族之仁者云仁賢
者明尊卑之交非賢不友故也定本無宗字 箋有酒
至飲酒 正義曰此有酒有筭召族人飲之蓋是燕禮

非饗也何者聘禮注云饗謂享大牢以飲賓也今此唯有肥筭而已是非饗禮明矣今燕禮者是諸侯燕其羣臣及賓客之禮禮記云其牲狗不用羊豕此云有肥筭者天子之禮異於諸侯也宣十六年左傳曰王饗有體薦燕有折俎公當饗卿當燕王室之禮是天子饗燕之禮異於諸侯牲亦不同也 箋陳其至食禮 正義曰儀禮特牲少牢聘禮公食之等皆以簋盛黍稷則八簋是黍稷之器也故云陳其黍稷謂爲食禮案周官掌客職五等諸侯簋皆十二又公食大夫禮上大夫六簋此天子云八簋者據待族人設食之禮其掌客所云謂飧饔餼之大禮公食大夫是諸侯食大夫之禮若曰食特

牲者二簋少牢者四簋故玉藻云少牢五俎四簋然則大牢者當六簋上肥筭釀酒爲燕禮此爲食禮互陳之也知是食禮者燕禮主於飲酒無飯食則此簋盛黍稷是食禮可知周禮地官春人云凡饗供食米則饗禮有黍稷矣但饗主於飲不主於食此經不言酒殼獨陳八簋假令與上釀酒并爲一事亦不得爲饗禮何者饗亨太牢以飲賓不得用未成羊筭也但於肥筭之下旣言以速諸父又別言於粢酒埽以速諸舅明二者各爲一禮上句爲燕下句爲食燕言諸父食言諸舅互文以相通也推此明亦兼有饗矣但文不見饗耳伐木至渭矣毛以爲伐木於阪以驚鳥喻朋友切磋以成道也